

1 TESALONICENSES

Pablowã queétdih ï túyat tútat

¹ Weém Pablo, yeéb Tesalónica tútchidih moón jwĩ íp Dioíhwã, jwĩ Maáh Jesucristoíhwãbut ñi jumuchah, nin núodih biíhdih daacát túutnit, yeebdíh wã wahna caá. Weém, Silvano, Timoteojíh, jwiít biíc peihcannit yeebdíh búdí jwĩ túyat túutna caá. Jwĩ íp Dios yeebdíh oinit, ã teo wáaca naáh, ñi túi jummat pínah niijná.*

Tesalónicadih moón ï túut nuumát

² Diosdih úúbhna, “Míih Tesalónicadih moón ï túut nuumátji ã túina caá, Paá”, jwĩpí niijná caá. ³ Yeebdíh náhninit, Diosdih nin pah jwĩ níj úúbhna caá: “Paá, míih Tesalónicadih moón meemdíh túi jenah joinít, ma weñat pínahdih ípí chájna caá. Meemdíh oinit, bitadihbut oina, queétdih ípí túi teo wáacna caá. Jesucristo ã jwúub dei júúwát pínahdih túi wēi páinit, meemdíh ï cádahcan caá”, jwĩ niijná caá. Páant ñi jummatdih búdí wēinit, Diosdih “Túina caá, Paá”, jwĩpí niijná caá. ⁴⁻⁵ Jwĩ déewã panihnitá, Jesucristoíh túini doonádih yeebdíh naóhna, oboh jumni naáwát nihcan jí. Obohjeéhtih, Túini Espíritu ã wēpatjíh yeebdíh jwĩ naáwáp jí. Páant jwĩ naáwáchah, Túini Espíritu yeebdíh ã teo wáacap jí, jwĩ naáwát dih joinít, ñi jepahat pínah niijná. Páant ñi jepahachah, Dios yeebdíh oinit, áihwã pínah ã ñíwatdih jwĩ jéihna caá. Ñijeéh jumnit, yeebdíh jwĩ túi teo wáacatjidih yeebbút ñi jéihna caá.

⁶ Ñijeéh jumna, ded pah jwĩ chájatjidih ennit, jwĩ Maáh Jesucristo ded pah ã jummatji doonádihbut jéihnit,

* 1:1 Hch 17.1

yeebbút biíc yoobó ñi chājna caá. Jesúh tūini doonádih joíhcan íjna, bita yeebdíh yeejép ĩ chājachah yuhna, Túini Espíritu yeebdíh ā teo wáacachah, yeéboó wēinit, Diosdih ñi túi joyóp jĩ.* ⁷ Páant ñi jummat doonádih joinít, nihat ñíih baác Macedonia baácdih moón, nin baác Acaya baácdih moón Jesúhwā ñi jummat pah muntih túut nuumná caá ĩ chājap. ⁸ Pánihna, jwĩ Maáh Jesúh doonádih jepahnit, ñi túi túut nuumátji doonádih joinít, bitabút jwĩ Maáhdih ĩt jepahap wut jĩ. Níih baácdih moón, Acaya baácdih moonjéhbút nihcan, nihat baácdih moón Diosdih ñi túi jepahat doonádih ĩt joyóp wut jĩ. Nĩ wūt yána caá. Jwiítboó ñíih doonádih queédih jwĩ naóh jwuhcah, queét játih ĩtát joyóp tabe. ⁹ Pánihna, ñi túut nuumát doonádih jwĩ naáwát déedih, yeéb jwiít dih wēi jwāáhnit, ñi túi joyátjidih ĩpĩ jwāáh naáwáp jĩ. Nĩ pāpninadih uúbh cádahnit, Dios yoobát dihjeh wēi uúbh nit, ā wutatdih ñi túi jepahatjidihbút ĩpĩ naáwáp jĩ. ¹⁰ Dios wūúh jeámant ā jwúub dei jūúwát pínahdih ñi túi páñatdihbút ĩpĩ naáwáp jĩ. Caán Jesús wunnijidih yuhna, Dios āt booanap tajĩ. Caan tígaá Dios yeejép yoobát ā peéh chājat déedih jwiít dih ā túi ubna caá.

2

Tesalónicadih jumna, ded pah Pablo ā jumatji

¹ Nĩjeéh jumna, yeebdíh jwĩ bohénachah, túi wēi joinít, ñi jepahap jĩ. Páant ñi jepahachah, jwĩ tewat oboh jumni nihcatdih ñi jéihna caá. ² “Pablowā jwiít dih enedih ĩ jūúwát pínah játih, Filipos tútchiboó ĩ bohénachah, íjnit, caán tútchidih moón queédih yeejép ĩ chājap

* 1:6 Hch 17.5-9

jĩ”, yeebboó ñi niij náhnina nacaá. Obohjeéhtih, Fili-
 posdih moón jwiítidih yeejép ĩ chājachah yuhna, um-
 canjeh, Jesúih doonádih yeebdíhbut naáwádih jwĩ jwibí-
 nap jĩ. Biquína ñíih tútchidih moón maáta jwiítidih ĩ
 naóh cádahat tútuchah yuhna, Dios ã teo wáacatjĩh
 Jesúih doonádih yeebdíh jwĩ túi naáwáp jĩ.* ³ “Pablowā
 yoobópdiħ ĩ naóhcan caá. Yeebdíh pániħ bohéna, queét-
 diħ ñi weñat pínahdiħjeh ĩ bidna caá”, biquína ĩ niij yeena
 caá. ⁴ Obohjeéhtih, Dios jwĩ jenah joyátidih jéihni nin
 pah ã niij naáwáp jĩ: “Jesúih túini doonádih ĩ naáwát
 pínah niijná, Pablowādiħ wā wahbipna caá”, ã niijjíp jĩ.
 Pániħna, caandiħ naóhna, “Pablowā túi chājnit caá”, bita
 ĩ niij jenah joyát pínahdiħ jwĩ bidcan caá. Diosboó “ĩ túi
 chājna caá”, ã niiját pínahdiħjeh bidnit, Jesúih doonádih
 jwĩ naáwáp jĩ.* ⁵ Pániħna, yeebdíh naóhna, túini niiját pah
 niijcán, ñíih bíi déediħ náahcan, ded pah jwĩ bohéátjidiħ
 ñi jéihna caá. Diosbut páant jwĩ chājatjidiħ ã jéihna caá.
⁶ “Pablowā chah jéihnit caá”, yeeb, bitabut ñi niij jenah
 joicát pínah niijná, yeebdíh jwĩ bohénap jĩ. ⁷ Jesucristoiħ
 túini doonádih yeebdíh naáwát túutna, Dios ã wahnit
 jumna, yeebdíh búdí jwĩta jéih wut tagaá. Obohjeéhtih,
 pániħ wutcan, búdí oinit, chāihjeh bohéna, yeebdíh jwĩ
 yójahcap jĩ. Nomanih mi wūndih túiniħjeh mi en dawát
 pah yeebdíh jwĩ bohénap jĩ. ⁸ Yeebdíh búdí oinit, wēina,
 niħat yeó jáap jummat pah túini doonádih jwĩ naáwáp jĩ.
 Bita jwiítidih ĩ mao yohíhatdiħ jéihna yuhna, yeebdíh jwĩ
 teo wáac cádahcap jĩ. ⁹ “Jwĩjeéh ĩ jum láa, íih bácaħ
 ã chūnácaħ yuhna, búdí ĩ tewep jĩ”, ñi niij náhnina
 nacaá. “Baáb jéenat pínah játih teo jwíihnit, púú niħat yeó
 jáap teo táah bejnit, chei tac yoob póhba ĩpĩ teo cádahap
 jĩ. Pániħna, Dioiħ túini doonádih naóhnit, jwiítidih tac

* 2:2 Hch 16.19-24; 17.1-9 * 2:4 Gá 1.10

bũugáhcán, ĩ jeémát pínahdih jíib chājat túut niijná, búdí ĩ tewep jĩ”, ñi niĩj jéihna caá.*

¹⁰ “Jwĩjeéh jumna, Dios ã weñat pínahdihjeh chājnit, ĩ túi jumap jĩ”, ñi niĩj jéihna caá. Diosbut caandíh ã jéihna caá. Pánihna, bita “Pablowā yeejép ĩ jumap jĩ”, ĩ jéih niijcán caá. ¹¹⁻¹² “Jwiít nihatdih túinijeh ĩ bohénachah, jwĩ túi joyóp jĩ. Biquínadihbut jwiít dih ĩ naáwáp jĩ. Ded ã wehdih ã túi bohéat pah jwiít dih ĩ túi naáwáp jĩ. Dios ã weñat pínahdih ded pah jwĩ chājat pínah niijná, búdí ĩ bohénap jĩ”, ñi niĩj jéihna caá. Dios yeebdíh át ñíwip wut jĩ, áihwā jumnit, ájeéh ã maáh jumapboó ñi jummat pínah niijná. Páant yeebdíh jwĩ bohéatjidihbut ñi quíib bũedcán nacaá.

¹³ Pánihna, yeebdíh jwĩ naáwát dih ñi túi jepahachah náhninit, búdí wēnit, “Túina caá, Paá”, Diosdih jwĩpĩ niijná caá. ã naáwát dih yeebdíh jwĩ bohénachah, nin pah ñi niĩj jenah joyóp jĩ: “Ĩ jenah joyátjĩhjah naóhna ĩ chājcan caá. Dios naáwát yoobát jwiít dih bohéna caá ĩ chājap”, ñi niĩj jenah joyóp jĩ. Pánih jenah joiná, caán naáwát dih joinít, Jesús dih jepahna, túiniboodíh túut nũumná caá ñi chājap. ¹⁴ Judea baác dih moón Dioíhwā ĩ jummat pah yeebbát bíic yoobó ñi jumna caá. Dios ã wahni Jesucristodih queét ĩ jepahat jíib, íih baác dih moón judíowā, queét dih yeejép ĩ chājap jĩ. Pánihat pah mũntih, yeebbát Jesús dih ñi jepahat jíib, ñíih baác dih moonjéh yeebdíh yeejép ĩt chājap taga.* ¹⁵ Queét judíowā jon játih Dios naáwát dih naóh yapanitjidih yehna niijnít, ĩt mao yohop tajĩ. Túttimah, jwĩ Maáh Jesucristodihbut ĩt mao yohop tajĩ. Túttimah, Dios naáwát dih ñi joicát pínah niijná, jwiítboodíh ñíih tútchimant ĩ bacanap jĩ. Pánih chājna, Diosdih búdí ĩjanit, nihat cáacwā dihbut ĩ eníhcan

* 2:9 Hch 18.3; 2Ts 3.8 * 2:14 Hch 17.5

caá.* ¹⁶ Judíowã nihcannit iiguípna ĩ bejat déedih náahcan, Jesúh doonádih naáwádih jwĩ bejechah, judíowã jwĩ naáwát dih ĩ jáhíhip yuh jĩ. Pánihna, Diosdih yehna ĩ niiját jíib, íijnit, Dios queétdih búdí ā peéh chāj bipna caá.

Pablo Tesalónicad ih moondih ā jwúub eníhat

¹⁷ Yeebdih wā cádah jūúwúchah, wíih caolih ñijeéh ā páñap be. Maátcanjeh ñijeéh wihcan yuhna, yeebdih búdí jwĩ bidip be. ¹⁸ Pánihna, búdí oina, yeebdih enedih jwĩ jwúub bejíhip yuh be. Weemjéh dawá láa yeebdih búdí enedih wā bejíhichah yuhna, Satanás jwĩ jib bejatdih ā jáhap jĩ. ¹⁹ Yeebdih Jesúh doonádih jwĩ naáwá chah, ñi túi joyátjidih náhninit, búdí jwĩ wéina caá. Jwĩ Maáh Jesús ā jwúub dei jūúwúchah, ñi jepahatjidih jenah joinít, búdí wéina, “Jwĩ naóhniji túini doonádih ĩ túi jepahap jĩ”, Jesús dih jwĩ niij naóh bipna caá. ²⁰ Pánihna, yeebdih jwĩ naáwá chah, ñi jepahatji jíib, jwĩ Maáh jwiít dih ā wéi naáwát dih jéihnit, jwiítbut búdí jwĩ wéina caá.

3

Timoteodih ā wahat

¹⁻² Pánihna, yeebdih búdí náhni dahwanit, yeebdih ā enat pínah niijná, Timoteodih ñi pebhna jwĩ wah bojop be. Caán jwĩ úud panihni, weemdih pej jumni, Cristoíh túini doonádih āpí naáwáp jĩ. Diosjeh caandih ā wahachah, weemdih búdí ā teo wáacap jĩ. Pánihna, yeebdih ā bohéat pínah niijná, ñi pebhna caandih wahniji, Atenas tútchiboó bíicjeh wā páñap jĩ.* ³ Jesús dih ñi jepahatji jíib bita yeebdih yeejép ĩ chājachah yuhna, Diosdih ñi cádahcat pínah niijná, yeebdih wā bohéat túutup jĩ. “Jesucristodih

* 2:15 Hch 9.23,29; 13.45,50; 14.2,5,19; 17.5,13; 18.12 * 3:1-2 Hch 17.15

jwĩ jepahachah, jwĩ túut nuumát dih íjnit, áihwā nihcan-
 nitboó jwiít dih yeejép ĩ chājbipna caá”, jwĩ niij jéihna
 caá. ⁴ Nijeéh jumna, páant jwĩ yapat pínahdih dawá láa
 yeebdíh jwĩ naáwáp jĩ. Bũũ jwĩ naáwátji pah ā yapatdih ñi
 jéihna caá. ⁵ Pánihna, ded pah ñi jumát dih búdí jéihíhna,
 Timoteodih wā wahap jĩ. “Nemépwā ĩ maáh queétdih ā
 yee naáwáchah, ¿queétboó caandíh yehna ĩ niijná niít?
 Yehna ĩ niijcáh, nihat conboó jwĩ bohéat búdí jwĩ tewatji
 buudní ā jum̄bipna caá”, wā niij jenah joyóp jĩ.

⁶ Bũũ Timoteo, ñi pebhboó juibíniji, ā jwúub juuyúp jĩ.
 Jwúub juinít, “Nihat Tesalónica tútchidih moón meemdíh
 búdí ĩ túyat túutap be. Queét Dios naáwát dih túi joiná
 beé ĩ chājap be. Túi joinít, Diosdih búdí oinit, ĩ míic
 túi oina beé. Yeebdíh náhninit, búdí wēinit, yeebdíh ĩ
 bidna beé. Yeéb queétdih bidnit, búdí enedih ñi bejíhat
 pah muntih, queébtut yeebdíh ĩ bidna caá”, weemdíh ā
 niij naáwáp jĩ.* ⁷ Páant ā niij naáwáchah, yeebdíh jwĩ
 náhni dahwaat ā yayáh bejep jĩ. Yeéb Dios naáwát dih
 jepahnit, ñi túi jumát doonádih joinít, bita jwiít dih yeejép
 ĩ chājachah yahna, búdí jwĩ wēina caá. ⁸ Yeéb jwĩ Maáh
 Jesús dih ñi túi péenachah, jwíih caolih búdí ā wēina caá.
⁹ Pánihna, “Paá, ma teo wáacatjĩh queét Jesús dih ĩ túi
 péeatdih jéihna, búdí wā wēina caá. Páant weemdíh ma
 weñaat ā túina caá”, Diosdih wā niijná caá. ¹⁰ Pánih
 wēinit, yeó jáap, cheibut Diosdih búdí jwĩ úubhna caá,
 yeebdíh enat túutna, jwiít dih ā wahat pínah niijná. Yeéb
 Jesús íhwā ded pah ñi túi chājat pínahdih beh joyát yeebdíh
 páantjeh ā judhduchah, ñi pebhna jwúub bohénadiah jwĩ
 bejíhna caá.

¹¹ Yeebdíh jwúub enedih jwĩ bejat pínah niijná, Satanás
 ā jāhat panihatdih ĩ yohat pínahdih jwĩ íp Diosdih, jwĩ

* 3:6 Hch 18.5

Maáh Jesucristodihbut búdí jwī úúbhna caá. ¹² Pánih úúbhna, jwī Maáh yeebdíh ã teo wáacat pínahdih jwī úúbhna caá, chah míic oinit, nihatdihbut ñi oyat pínah niijná. Pánihna, yeebdíh búdí jwī oyat pah muntih, yeebbút biíc yoobó ñi oyat pínahdih wã náah yacna caá. ¹³ “Paá, queétdih ma túi teo wáacá, ma weñat pínahdihjeh ï chājat pínah niijná”, jwī niíj úúbhna caá. Páant ã teo wáacachah, jwī Maáh Jesucristo nihat áihwājeéh jwúub dei jūóhñit, Jesús jwī íip Diosdih nin pah ã niíj naóhñipna caá: “Queét túinit ï jumuchah, queétdih dedé peéh chājat pínah ã wihcan caá”, ã niijbípna caá.

4

Dios ã weñat pínahdih ded pah ï chājat

¹ Búú biíh bohéatdih yeebdíh jwī naawát túut caá. Ñijeéh jwī jum láa, Dios ã weñat pínahdih ded pah ñi chājat pínahdih jwī bohénap jī. Páant jwī bohéatjidih ñit quiib búucáp taga. Páant ñi chājat chah ñi túi jepahatdih yeebdíh búdí jwī náah yacna caá.

² Jwī Maáh Jesucristo ded pah ã wutatjidihjeh yeebdíh jwī naóh yapaatdih ñi túi jéihna caá. ³ Nin pah ñi jum pínahdih Dios ã náah yacna caá: Diosdih jepahcannit ï jum pahnah yeebbút ñi jumca bojoó. Ñi áa nihcannitjīh yeejép ñi chājca bojoó. ⁴ Dios ã enechah, cáacwābut ï enechah, ñi túi áa jumúú. Pánih áa jumnit, mijeéh ñi túi jumúú. ⁵ Diosdih jéihcannit ï áa nihcannitjīh ípí metna caá. Obohjeéhtih, yeéb Diosdih jéihñitboó páant ñi chājca bojoó. Ñi weha mána yaádhjeéh túinijeh ñi jumúú. ⁶ Mijeéh bóojeéh jumnihdih ñi dúuc wái metca bojoó. Dios nihat ñi chājatdih jéihñit, páant ñi chājat jīb búdí ã peéh chājñipna caá. Jon ñi pebh juibínitji caandíh búdí jwī bohénap jī. ⁷ Dios jwiítidih íi náah chājatdih wutcan,

túinijeh jwĩ jumát pínahdih ãt wutap wut jĩ. ⁸ Butéh wã naáwát dih weemjéh wã wutat nihcan beé. Dios yeebdíh páant ã wutatdih wã naóh yapanap be. Pánihna, ded caandíh yehna niijná, weemdíh nihcan, Diosboodíh ã yap yohna caá. Caán caá Túini Espíritudih yeebdíh wũhni.

⁹⁻¹⁰ Bũũ míic oyatdih yeebdíh bainí wã naáwát túut caá. “Ñi míic oyoó”, Dios ã niij wutatdih joinítji caandíh túi jepahna caá ñi chãjap. Pánih jepahna, nihat ñíih baác Macedoniadih moón Jesúíhwā dih yeéb ñi túi oina caá. Pánih míic oinit, chah míic teo wáacnit ñi jumũũ. ¹¹⁻¹² Pánih míic oina, bíicdih túinijeh ñi jumũũ. Míic jũihcanjeh, bitadih yeejép táoh naóhcan, bita ĩ tewatdih tũbit ñi en naóhca bojoó. Yabhcanjeh, ñi túi teweé. Pánih teonit, bitaíh bií déedih, íih jeémát dihbut tũbit ñi uúbh tac buugáca bojoó. Pánih wutatdih jáantjeh yeebdíh jwĩ naáwáp jĩ. Caandíh ñi jepahachah, Diosdih jéihcannitboó yeebdíh ennit, “Queét túi chãjnit caá”, ĩ niijbipna caá.

Jesucristo ã jwũũb dei jũúwúchah, ded pah ã yapat pínah

¹³⁻¹⁴ Bũũ, jwĩ déewã panihnitá, Jesúíhwã ĩ wunuchah, ded pah ĩ yapat pínahdih yeebdíh jwĩ naáwát túut caá, tũbit ñi jíghacat pínah niijná. Jesucristo ã wunat túttimah, Dios caandíh ãt jwũũb boanap tajĩ. Caan páh mũntih jwiít áihwã jwĩ wunat túttimah, jwiít dihbut ã jwũũb boanachah, Jesús ã jumupboó ãjeéh jwĩ túi jum-bipna caá. Páant jwĩ yapat pínahdih ñi túi náhninaá. Pánih náhninit, Jesúíhwã, ñi oinit ĩ wunat túttimah, ñi bidna yahna, tũbit ñi jíghaca bojoó. Bita Jesús dih jepahcannit, Jesúsjeéh ĩ wihcan níit. Pánihna, ĩ oinit ĩ wunat túttimah, ĩ jwũũb míic encat pínahdih jéihna, búdí jíghanit, ĩ moh yéejna caá. Obohjeéhtih, Jesús dih jepahcannit ĩ jíghat pah yeéb ñi jíghaca bojoó.

¹⁵ Nin pah Jesússeh ã naáwátjidih yeebdíh jwĩ naóh yapana caá: “Queét wííhwã wunnitji ĩ boo pud jũúwát pínah játih, wuncannit ĩ waóh púuh laab béj páican niít”, Jesús át niijíp wut jĩ. ¹⁶⁻¹⁷ Nin pah ã yapbipna caá: “Ñi púuh laáb jũúwá”, Jesús ã niij ejatdíh, ángelwã ĩ maáh búdí ã ejatdihbut jwĩ joibípna caá. Dios ã wũhni póojat nahjĩh ángelwã ĩ maáh ã póojochah, jwĩ joibípna caá. Páant ã yáanachahjeh, jwĩ Maáh Jesucristo ã jwúub dei jũóhbirna caá. Páant ã dei jũúwúchah, áihwã wunnitji, Jesús ã boo pud jũúwátji pah muntih, ĩ boo pud jũóhbirna caá. Queét ĩ boo pud jũúwúchah, jwiít áihwã wuncannit, ĩjeéh wáac jubínit, wépép púuh laab béjnit, mah tólihna nihat bíicdih jwĩ Maáh Jesússeh jwĩ jwááhbirna caá. Pánihna, jwiít nihat bíicdih Jesússeh páantjeh jwĩ jumbipna caá.*
¹⁸ Pánihat pínahdih jéihnit, yeéb bitadihbut jwúub naóh yapanaá, Jesúsíhwã wunnitdih tubit ĩ jíghacat pínah niijná.

5

¹⁻² Bũũ, wã déewã panihnitá, Jesúsíhwã wunnit ded pah ĩ yapat pínahdih ñi jéihna caá, buca. Obohjeéhtih, débólih Jesucristo ã jwúub dei jũóhni yeó jáap pínahdih jwiít cáacwã jwĩ jéihcan caá. “Náhnica, nuumní ã juyát pah jwĩ Maáh Jesucristo ã jwúub dei jũóhbirna caá”, yeebjéh ñi niij jéihna caá. Páant ñi jéihyechah, wã jwúub naóhcan niít.*
³ Diosdih jepahcannit nin pah ĩ niijbípna caá: “Bũũ túini láa caá. Cáacwã ĩ míic maocah, úumcanjeh, jwĩ túi jumna caá. Yeejép yapat jwiítidih ã wihcan niít”, ĩ táoh niijbípna caá. Páant ĩ niijchahjeh, caandíh ĩ jepahcatji jíib, Jesús peéh chãjadih ã jwúub dei jũóhbirna caá. Yaádh ĩ weép jáaat dée pah

* 4:16-17 Mt 24.30-31; Mr 13.26-27; 1Co 15.51-52

* 5:1-2 Mt 24.43; Lc 12.39; 2P 3.10

ã jumbipna caá. Wudu jumnih mi weép jáanachah, caán tubatdih mi jéih jweicán caá. Pánihat pah Jesucristo ã jwúub dei júúwúchah, caandíh jepahcannitji ĩ yéejat jíib ĩ jéih jweicán níit.* 4-5 Obohjeéhtih, wã déewã panihnitá, yeéboó dupúnar panhipboó jumcan, baabáp panhipboó ñi jumna caá. Jesúsdi h jepahcannit, bita ĩ encat pínah niijná, dupúnarboó yeejép ĩpí chājna caá. Obohjeéhtih, yeéboó páant ñi chājcan caá. Pánihna, náhnica h nũmní ã waád juyát pah, Jesús ã jwúub dei júúwúchah, ñi wáhi bejcan níit. Yeebdíh peéh chājadi h júóhna ã chājcan níit. 6 Jwiít Jesúhwã jumna, caandíh jéihcannit ĩ chājat pah jwiít di h chājcat caá náahap. Ëonit panihnit jumna, ded pah nin baácboó ã yapat di h queét ĩ jéihcan caá. Obohjeéhtih, jáanit panihnit, “¿Dios ã weñat pínah di h chājat túut niijná, ded pah wã chājbi?” níj jenah joyát caá jwiít di h náahap. “Waícanjeh Jesucristo ã jwúub dei júóhbipna caá”, níj náhninit, túi chājat caá náahap. 7 Jesúsdi h jepahcannit, dupúat panhipboó jumna, Ëonit panihnit caandíh ĩ joicán caá. “Jesús ã jwúub dei júóhcan níit”, níj jenah joinít, ĩ weñat pínah di h jeh chājnit, ĩpí babh máihna caá. 8 Obohjeéhtih, jwiít baabáp panhipboó jumnit di h Dios naáwát di h túi jenah joyát caá náahap. ã weñat pínah di h jenah joinít, yeejép chājcat caá náahap. Soldado míic mawadi h bejna, ĩtah wao chá páha páahnit, áih báca di h jāhat pínah niijná, ĩtah chóodihbút áih tacamant āpí duoná caá. Pánihna, soldado ã míic jāhat pah, jwiít Jesúhwā di h bút míic jāhat caá náahap. Obohjeéhtih, jwíih báca di h jeh pohba jāhat di h niijná wã chājcan caá. Jwíih caoli di h jāhat di h niijná caá wã chājar. Nin caá jwíih caoli di h jwí jāhat pínah: Jesucristo di h túi jenah joinít, Dios di h cáacwā di h bút túi oyat caá caoli di h

* 5:3 Is 13.8

jāhat ã jũmũp. “Jesús wã yéejatdih yohnit, weemdíh ãjeéh ã ub bejbipna caá”, niíj jenah joyátbũt caolih jāhat ã jũmna caá. Pánih jāhñit panihñit jũmna, Satanás jwiítdíh ã yéejat túutũchah, caandíh jwĩ jéih yap yohna caá.*
⁹⁻¹⁰ Jesucristodih jepahcannit biícđih Dios jwiítboodíh át peéh chājílcap wũt jĩ. Obohjeéhtih, áihwã jwĩ jũmat pínah niijná, jwĩ yéejat jíib, jwĩ Maáh Jesucristo jwiítđih át wũn wũhũp wũt jĩ. Pánihna, jwiít áihwã jũmñit, nin baácboó páantjeh jũmna, wũnna yũhna, nihat biícđih ãjeéh jwĩ túi jũmbipna caá. ¹¹ Caandíh náhninit, Jesúsđih ñi túi jenah joyát pínah, ñi jepahat pínahđihbũt páantjeh ñi míic teo wáacá.

Pablo queéđih biíh ã wũtat

¹²⁻¹³ Bũũ yeebdíh bainí wã jwũub naáwát túut caá, páant mũntih. Ñijeéh jũmñit Dios naáwátđih yeebdíh ĩ bohénachah, ñi túi joyoó. Yeebdíh bohéat pínah niijná, Diosboó queéđih ã wũtũchah, yeebdíh bohénit, búdí ĩ teona caá. Pánihna, queéđih oinit, ñi túi jepahaá. Yeebbát míic oinit, biícđih ñi túi jũmũú.

¹⁴ Yabhñitđih ñi tewat túutú. Ūmñitđih, jígahñitđihbũt ñi weñanaá. Wẽpcannitđih ñi túi teo wáacá. Bitadıh yójahcan, ĩjeéh ñi túi jũmũú.

¹⁵ Yeebdíh yeejép chājñitđih ñi yéej chāj jwũubaca bojoó. Nihatđih túi chājñit, biícđih ñi túi jũmũú.

¹⁶ Ded pah yeejép yapna yũhna, Diosđih túi jenah joinít, páantjeh ñi weñeé.* ¹⁷ Caandíh ñi uúbh cádahca bojoó. ¹⁸ Yeó jáap jũmat pah “Túina caá, Paá”, Diosđih niijnít ñi jũmũú. Túi yapna, yeejép yapna yũhna, biíc yoobó “Túina caá, Paá”, niijnít ñi jũmũú. Pánihatđih Dios yeéb Jesúíhwãđih ã náah yacna caá.*

* 5:8 Is 59.17; Ro 13.12; Ef 6.13-17 * 5:16 Fil 4.4 * 5:18 Fil 4.6; Col 4.2-7

¹⁹ Túini Espíritudih túi jepahnit, ded pah ã teo wáacatdih ñi jãhca bojoó. ²⁰ Detdih Túini Espiritu ã naáwáchah, queét ï naóh yapañhichah, yeéboó joíhcannit pah ñi jumca bojoó. ²¹ Pánihna, nihat naáwátidih túi jenah joinít, ded túini, ded túicanni ã jummatdih ñi jéihyeé. Pánih jéihna, túinidih jepahnit, ñi náhninaá. ²² Obohjeéhtih, túicanniboodíh, ñi joyáh bojoó.

²³ Jwiít yeebdíh Díos ã túyatdih búdí jwí náah yacna caá. Pánihna, yeebdíh uúbhna, “Paá, queét míihwādhíh búdí ma teo wáacá, yéej chājatdih ï yap yohat pínah niijná. Meemdíh ï túi jenah joyát pínahdihbut teo wáacnit, queétdih ma túi wapaá”, búdí jwí níj uúbhna caá. Páant ã teo wáacachah, jwí Maáh Jesucristo ã jwúub dei jūóhni yeó jáapdih yeéb áihwā túinit ñi jumcipna caá. ²⁴ Diosjeh yeebdíh ñíonit, ã niijátji pah yeebdíh ã túut nuúm péabipna caá.

Pablo ã péé túyat túutat

²⁵ Wā déewā panihnitá, jwiítdihbut búdí ñi uúbú.

²⁶ Díos ã oyatjĩh nihat Jesúíhwā ñi túi míic uúbú.

²⁷ Jwí Maáh Jesús ã enechah, nin pah yeebdíh wā naóhna caá: Nin núodih ñi pebhna ï ub juibínachah, nihat caánboó jumnit Jesúíhwādhíh ñi túi en naáwá.

²⁸ Jwí Maáh Jesucristo yeebdíh oinit, ã túi teo wáaca naáh.

Páant bóojeh tigaá wā naáwát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 12 Mar 2019 from source files dated 5 Mar 2019

34c9543b-57a6-5290-ab7b-4fa15529a7e2